



LËTZEBUERG ENTDECKEN

De Béier, d'Gierwerei an d'Ardennen-Offensiv

22. Jul 2019 - 17:00

An eiser Serie "Lëtzebuerg entdecken" geet et an de Norden op Wolz. Am Schlass ginn et do direkt dräi Muséeën ënner engem Dach ze entdecken. De Pit Walté war dohinner.

Pit Walté / cbi



Ee vun den dräi Muséeën, déi ee sech an de Raimlechkeeten ukucke kann, ass den nationale Musée vun der Braukonscht. Als éischt kënnst een an e Raum, an deem en historesche Café nogestallt gouf, mat original Miwwelstécker aus Wirtschaften.

E puer méi speziell Miwwele ginn et ze gesinn, ënner anerem eenzegaarteg Miwwelstécker fir d'Lëtzebuurger Geschicht, zum Beispill de Comptoir aus dem Café Wëlle Mann an der Stad, wou eng laang Zäit Politik gemach gouf.

De Béier vu Lëtzebuerg

An anere Raim steet d'Geschicht vum Lëtzebuurger Béier am Mëttelpunkt, dat wat ee fir d'Produktioun u Matière première brauch, an och wéi en hiergestallt gëtt. An deem Kontext bitt de Musée och Seminaren un,

an deenen ee selwer Béier maache kann. Schmaachen dierf een en dann natierlech och.



Deen zweeten Musée ass dee vun der Gierwerei, dee klengste vun den dräi. Do sinn e puer Apparaturen ausgestellt, déi ee fir dat Handwierk brauch, d'Geschicht vun der Gierwerei zu Wolz gëtt erkläert a Fotoe sinn ze gesinn.

D'Ardennen-Offensiv

Nieft dem Handwierk gëtt am drëtten Deel vun de Muséeën eng wichteg Etapp an er Geschicht vum Éislek virgestallt, d'Ardennen-Offensiv vum Dezember 1944. De Schwéierpunkt läit do awer net op de militäreschen Aspekter vun dese Kampfhandlungen, mee et gëtt gewisen, wéi en Impakt se op d'Liewe vun de Bierger a vun den Zaldoten hat.

Eng Geschicht, déi do gezielt gëtt, ass déi vum amerikanesche Kleeschen. 1944 wollten d'Amerikaner, déi zu Wolz stationéiert waren, de Kanner eppes Guddes maachen an de Kleesche féieren. Séier goufe Schockela a Kichelcher zesummegesicht an de Private Richard Brookins huet d'Roll vum Kleeschen iwverholl.



An dee Richard Brookins ass och Jore méi spéit ëmmer nees op Wolz zeréckkomm fir de Kleeschen ze spillen, bis e leider d'lescht Joer am Alter vu 96 Joer verstuerwen ass.

An der Mediathéik:

[Lëtzebuerg entdecken](#) / 22. Jul 2019 - 07:22 / Pit Walté

Lauschteren 